



HAL
open science

Knananuk dada ró iha Ataúro

Dana Rappoport

► **To cite this version:**

Dana Rappoport. Knananuk dada ró iha Ataúro. Lian Rama hana. Istoría lian no knananuk Atauro, 2023, 9782709930024. halshs-04354245

HAL Id: halshs-04354245

<https://shs.hal.science/halshs-04354245>

Submitted on 9 Jan 2024

HAL is a multi-disciplinary open access archive for the deposit and dissemination of scientific research documents, whether they are published or not. The documents may come from teaching and research institutions in France or abroad, or from public or private research centers.

L'archive ouverte pluridisciplinaire **HAL**, est destinée au dépôt et à la diffusion de documents scientifiques de niveau recherche, publiés ou non, émanant des établissements d'enseignement et de recherche français ou étrangers, des laboratoires publics ou privés.

Knananuk dada ró iha Ataúro

Ita bele hetan Knananuk dada ró (ro hlerin) tipu rua iha illa Ataúro: Knananuk hean no Knananuk dada ró husi foho leten ba tasi. Maski kategoria Primeiru lakon tiha ona bainhira motór sira to’o mai, maibé Knananuk dada ró sei kanta to’o ohin loron. Atividade ne’e hanaran ro nglorun (Raklungu), klorun ro’o (Hresuk), sarak loi (Dadu’a), re loi (Rasua). Maski sira hela besik tasi ka iha rai-klaran iha altitude aas, povu Ataúro presiza ró atu halo Peska no halo viajen. Hanesan ai-saria ne’ebé uza hodi halo ró--Meliaceae, husi jéneru Toona, T. ciliata M.Roem (Hresuk, lero) - hetan de’it iha ai-laran foho, dook husi tasi-ibun, ema tenke dada husi dook.

Bainhira ai-hun ne’e monu tiha ona, sira ke’e kuak iha ai-hun ne’e. Tuirmai tenke lori ida-ne’e tun ba tasi. Tanba ró ne’e halo husi ai-hun ida de’it, ne’e hanaran ró monoxilitiku (monoxylon). Haree ba ninia todan boot dada ró ne’e husi ai-laran ba tasi-ibun presiza esforsu koletivu boot. Ema na’in 100 liu ne’ebé jeralmente mane, maibé feto sira mós partisipa hodi lori ai-han hotu-hotu ne’ebé nesésariu ba durasaun viajen nian, ne’ebé sei dura husi loron ida to’o loron tolu.

Bainhira ró prepara ona, hili loron ida atu dada ba tasi. Partisipante sira hasoru malu iha ai-laran iha ai nia oin. Antes sira hahú viajen ne’e, sira hala’o rituál ida. Prepara Ró: tali kesi iha sorin ida-



Dada ró, Ili Timur, 22/04/22



Dada ró, Makadade, 23/04/22



Dada ró, Makili, 22/11/2019

idak, tali leten uza atu kaer ró, tali kraik uza atu dada. Iha ró laran hatama sasán bua malus. Tuirmai hahú haketak rituál husi ai-riin. Iha Makadade, iha Knananuk introdutóriu rua, ne'ebé triste liu iha natureza, no kanta iha pozisaun estatika liu husi koru hamutuk, ho solista sira: Knananuk dahuluk, *Tei*, lori ema hotu hamutuk. Tuirmai Knananuk *Raho*: Knananuk despedida nian ne'ebé hala'o la ho movimentu, durante haketak. Knananuk ne'e hala'o husi especialista ida iha Knananuk rituál (*hleri opun*), ne'ebé maka'as no solene, ho liafuan kriptiku. Tuir mai hahú ho Knananuk ró sira nian, no la para, ne'ebé hatudu ba ema hotu katak ró atu sai ba (*hleri klorun ro'o*).

Dada ró presiza hananu knananuk. Se la hananu, prosesu ne'e sei iha perigu ka perigu boot. Foho ne'e nia ninin aas tebes no ró bele monu. Entaun ema atus ida hananu hamutuk hodi halo sinkronizasaun ba sira-nia hakat no la'o ba oin. Maizumenus iha kategoria ualu husi knananuk dada ró (*hleri klorun ro'o*) ho total matríz melodiku-ritimiku 30 ne'ebé la hanesan tuir inklinasaun husi terenu: iha inísiu, sa'e foho, tun foho, fatuk lolon, rai tetuk, ba oin, ba kotuk, besik tasi ka iha tasi-ibun. Bainhira dalan fasil no la iha perigu, grupu ne'e la'o lailais, no kanta lailais. Partisipante hotu la'o ba oin iha pasu kadensia -ne'ebé marka baku tolu ho sira-nia ain no husik tiha suspende baku haat. Maibé bainhira dalan iha inklinasaun boot ne'ebé perigu tebes, (iha rai monu ka fatuk lolon), ritmu la'o neineik. Tipu inklinasaun nune'e tuir ho múzika no lian husi knananuk.

Oinsá mak knananuk sira-ne'e sinkroniza bainhira partisipante sira habelar iha fatin boot? Versu sira-ne'e iha forma rua-rua nian (liña 2). Lider ida (*hleri opun*) fó sai liña primeiru, no tuirmai koru (partisipante hotu-hotu) iha ró nia oin no kotuk hatán ho liña segundu iha lian ida de'it. Partisipante sira-ne'e hetan orientasaun husi indikadór rua: husi tempu ne'ebé lider sira fó, sira hatene se sira tenke neineik ka lailais, no husi liafuan sira-ne'e sira komprende se sira sa'e ka tun hananu knananuk ne'ebé sira hananu fila-fali fó dalan ba sira atu halo sinkronizasaun ba sira-nia movimentu bainhira sira la'o liu rai ne'ebé susar. Iha illa tomak iha melodia no liafuan balu komún tebes. Liafuan sira-ne'e la'ós de'it kona-ba ró nia movimentu, maibé mós kona-ba se mak halo ró. Sira mós bele ko'alia kona-ba proposta kaben nian ne'ebé simbóliku. Ró sai nu'udar noiva joven ida-ne'ebé haketak husi ninia família, hanesan ai-hun haketak husi ninia ai-riin. Noiva ne'e tenke enfrenta buat di'ak no la di'ak no kontinua maske nune'e. Iha lian oioin iha illa ne'e, ema hananu ho entuziazmu ba labarik-feto joven ne'e: «buka sabaun, buka mina morin, ita fetu ne'ebé midar» (*Sanga rodi sapa morin, Sanga rodi mina morin, O heklara kauda*).

Iha illa Ataúro nia laran tomak, dalan sira husi ró liu husi foho ba tasi, sei iha memória husi grupu illa ida-idak nian. Depende husi atu ba ne'ebé, sira dada sira ba tasi parte súl husi Makadade ba Berau, husi Apak Ngara ba tasi-ibun Lengari, iha ne'ebé foho ne'e tun ba tasi tuir terrasu, tuirmai ba Makili, ka iha parte Leste, ba Bikeli, ka ikus mai ba parte oeste, husi Ili Timur ba Atekrú.

Referénsia Youtube

- Knananuk dada ró iha Makili, 2019, Klorun ro, <https://youtu.be/ye7O2EY1mok>
- Knananuk dada ró iha Ili Timur, 2022, Sarak loi: <https://youtu.be/jtWFSHetBsE>
- Knananuk dada ró iha Makadade, 2022, Ro'o nglorun, part 1 <https://youtu.be/gNc46BS3uvk>, part 2 <https://youtu.be/2MNkIXpZezU>

Dana Rappoport